

# SOURNETTOS. PER J.-A. RECLUZ

LA BOUNABANTURO.

( 2 juillet 1854. )

Certain gascou qu'abio de pourrituro  
Amb'un coumpaïré al fait de soun mestier,  
Adréchoment, dedins tout soun quartier,  
S'èro fach un rénoun per la bounabanturo.  
Et millou que dégus al libre de naturo,  
Légissio d'un cadun lou présent, l'abéni,  
Del passat, atabé, bous fasio coumbéni:  
    La caouso èro séguro!  
    Ne pourrez pas douta  
    S'anas lou counsulta,  
    Disio nostre coumpaïré;  
Mais n'es pas coumplasent, cal fa milo fayçous,  
    Coumo un corps sant lou prèga d'aginous;  
    Et s'y boulès coumplaïré  
Aoumens, pas ges d'argent! car n'aourias un répous,  
    Et damo Bérifat restario dins soun pous.  
    Tant souloment à sous pès et sans riré,  
Bou li cal fa: Moussu, bous prègui de me dire  
    Tout ço qu'ay fach et tout ço que faray,  
Despey que soy nascut et tant que yeou biouray.  
    Se cal pas que préga, seray pas la darnieyro  
    Respond uno chambrieyro,  
Curiouso que noun say de couneyssé soun sort.  
    Touto fillo es curiouso  
    Surtout s'es amourouso;  
Per fait d'acos yeou crési qu'a pas tort;  
    Fossés ou serian à sa plaço,  
    Mais laissen-la parla d'abord.